

Geagte Mnr / Mev / Mej

NB: Die amptelike Highveld Sindikasie Aksiegroep (“HSAG”) kennisgewings is die enigste amptelike inligtingsbronne waar beleggers inligting oor die HSAG kan bekom. Ons nooi u verder vriendelik uit om ons webblad by www.hsaction.co.za te besoek vir enige verdere inligting. E-posse word ook van tyd tot tyd uitgestuur. Die onus is altyd op beleggers om seker te maak dat hul aansoekvorms tot die HSAG korrek voltooi is en om ons op hoogte te hou van enige veranderinge met betrekking tot hulle kontakbesonderhede asook hul e-pos adresse.

Besoek asseblief ons webtuiste en voltooi die HSAG-vraelys op “Survey Monkey”.

ADMINISTRATIEWE AFSNYDATUM VIR REGISTRASIE BY DIE HSAG

GELIEWE KENNIS TE NEEM dat 31 Maart 2017 die afsnydatum vir laat-registrasies vir aansluiting by die HSAG was. Enige verdere laat-aansoeke sal slegs op 'n *ad hoc*-basis en onderhewig aan spesifieke vereistes oorweeg word.

Verdere versoeke en navrae moet skriftelik aan hsagenquiries@gmail.com gerig word.

VOORWOORD

Dit is vir die HSAG-bestuur 'n voorreg om die nuutverkose HSAG-bestuurslid, mnr Francois Strauss, aan u voor te stel en by die HSAG te verwelkom. Mnr Strauss is 'n besigheidsman van die Wes-Kaap en is ook 'n Applikant in die HSAG-aangeleenthede teen mnr Nic Georgiou en andere.

Die HSAG-bestuur sien uit om saam met Mnr Strauss te werk ten einde elke belegger se belange te beskerm.

Die klas-aksie gaan voort en beweeg positief vorentoe. Tydens 'n onlangse meningspeiling wat die HSAG gedoen het, het 90.63% van die deelnemers aangedui dat litigasie (hofsake) die enigste manier is om verliese gely, vanaf mnr Nic Georgiou en Respondente in hofsake te verhaal.

1. DIE HSAG KLAS-AKSIE

Soos voorheen berig, het die HSAG onlangs drie gunstige beslissings van Hooggeregshowe ontvang wat spesifiek gehandel het met die poging van mnr Nic Georgiou en Andere om Theron & Vennote op 'n onreëlmatige wyse te vervang as prokureurs van rekord en daarna die klas-aksie terug te trek. (Sien ook hieronder 'n Bevel van die Hoogste Hof van Appèl.)

Alhoewel hierdie aangeleenthede suiwer interlokutêr (interim) van aard is, en dus die gevolg het dat daar nie teen die uitsprake geappelleer kan word nie, het mnr Nic Georgiou en Andere Kennisgewings op ons kantore beteken waarin hulle kennis gee van hulle voorneme om teen beide dié uitsprake te appelleer.

Ons is tans in afwagting vir Hofdatums van onderskeidelik die Hooggeregshof van Pretoria en Johannesburg waartydens die Appèlle aangehoor sal word en behoort dit binne die volgende twee kwartale afgehandel te wees.

Dit is baie duidelik dat mnr Nic Georgiou en Andere bloot appèl wil aanteken ten einde die Hofproses te frustreer en om tyd te koop. Ons firma en advokatuur verwag egter gunstige uitsprake in beide Howe en sal dit sterk oorweeg word dat daar bestrawwende kostebevele teen mnr Nic Georgiou en andere gemaak word.

Sodra ons datums ontvang kan ons dit op ons webblad bekend maak. Beide hofuitsprake (asook die Appèlhof se Bevel) is beskikbaar op ons webblad by www.hsaction.co.za onder *Media, Press releases and notices* en wil ons u uitnoui om dit gerus te lees.

2. SKIKKINGSONDERHANDELINGE

Mnr Nic Georgiou het vroëer vanjaar plegtig onderneem om teen 30 April 2017 die eerste betaling, vir persone wat aangedui het dat hulle wil skik, te maak en is daar ooreengekom dat hy die skikkingsdokumente vóór of op 31 Maart 2017 sou onderteken. 'n Lokaal in Stellenbosch was gereserveer vir die ondertekening op 30 en 31 Maart 2017 en die nagenoeg 800 skriftelike skikkingsooreenkomste was aan mnr Nic Georgiou getender om te onderteken.

Mnr Nic Georgiou het egter tydens dié ontmoeting geweier om die skikkingsooreenkomste te onderteken omrede dit volgens hom geen voordeel vir hom sou inhou om slegs 'n gedeelte van die klas-aksie te skik nie en het hy aangedui dat hy slegs finansiering sal kan kry indien die klas-aksie in sy geheel geskik word. 'n Finale sperdatum waarop mnr Nic Georgiou 'n verbeterde aanbod moes maak was gestel vir April 2017.

Mnr Nic Georgiou het egter nie sy woord gestand doen wat 'n verbeterde aanbod betref nie en het die HSAG-bestuur op 4 Mei 2017 besluit om alle skikkingsonderhandelinge met mnr Nic Georgiou/Orthotouch te staak en om steeds volstoom voort te gaan met die litigasie proses.

In die verband kan u gerus die skrywe lees wat op ons webblad geplaas is wat mnr Johan Stander, lid van die HSAG-bestuur, aan mnr Nic Georgiou op 5 Mei 2017 gestuur het.

3. HELGARD HANCKE EN ANDER SE SKIKKING BUIE DIE HSAG.

Enige skikking(s) met mnr Nic Georgiou en/of deur mnr Helgard Hancke en ander persone, buite die HSAG, (die sogenaamde nuwe Orthotouch "Opsie 4") word gekortwiek met 'n voorwaarde wat dit duidelik maak dat die belegger algeheel afstand doen van sy reg tot 'n HSAG klas-aksie en al die persone teen wie opgetree word. Die aangaan van 'n skikking sal dus wél op hierdie basis beteken dat die belegger nie meer aan die HSAG klas-aksie kan deelneem nie en dus afstand gedoen het van sy/haar regte om vir die balans te skik.

Mnr Hancke het onlangs kontrakte uitgestuur om lede van die HSAG te oorreed om skikkingsooreenkomste met Orthotouch te teken en sodoende effektiewelik te skik en van al hul eise wat hulle deur die HSAG teen mnr Nic Georgiou en ander Respondente in die HSAG klas-aksie het, afstand te doen.

Wat nog meer onrusbarend is, is dat die persone wat deur Mnr Hancke skik instem tot die volgende:

- Hul eise is slegs teen Orthotouch en spruit voort uit die Besigheidsreddingsplan en nie uit die beweerde valse wanvoorstellings van die Respondente nie.
- Beleggers aanvaar en stem toe tot die geldige bestaan en regsgevolge van die Art 155-Reëlinskema, terwyl die HSAG tans in die proses is om dit ter syde te stel. Die Art 155-Reëlinskema bepaal byvoorbeeld dat mnr Nic Georgiou algeheel kwytkeseld word van aanspreeklikheid.
- Beleggers moet hul oorspronklike dokumente by mnr Nic Georgiou se eie prokureurs liasseer, wat onder andere beteken dat, in die geval van 'n dispuut met Orthotouch, beleggers nie hul eie oorspronklike dokumente in hul besit sal hê ten einde hul eise af te dwing nie. Beleggers moet ook eers bewyse lewer van die betaling van hul bydraes tot regs- en administrasiekoste, alvorens dit betaal sal word.
- Beleggers se aanbod om met Orthotouch te skik is onherroeplik, wat beteken dat hulle nie daaruit kan onttrek nie.
- Orthotouch erken nie regs aanspreeklikheid in die Hancke-dokument nie, wat beteken dat 'n likwidateur die gelde so uitbetaal aan Orthotouch-beleggers kan terugeis, sou Orthotouch byvoorbeeld in die toekoms gelikwedeer word.
- Beleggers sal nie die oorspronklike sessie-dokumente in hul besit hê om enige aksie te staaf indien Orthotouch die terme van die ooreenkoms verbreek nie.
- Beleggers verloor al hul ander eise onmiddellik (behalwe die 50% vervat in die ooreenkoms) aangesien hul eise dadelik met aanvaarding (deur Orthotouch) oorgedra word aan Orthotouch en nie eers met ontvangs van die laaste betaling (soos uitgeengesit in die HSAG-skikkingsooreenkoms met mnr Nic Georgiou) nie.
- Beleggers se deelname aan die HSAG word met ondertekening van die Hancke-dokument dadelik beëindig en word nie slegs opgeskort (soos met die HSAG-skikkingsooreenkoms) tot en met die finale paaierment nie.
- Alle eise van die beleggers word geskik en nie net die eise wat met Orthotouch onderteken word op die Hancke-dokument nie (m.a.w. as 'n belegger sy eis ten opsigte van een sindikasie geskik het word dit beskou asof hy/sy al sy/haar eise geskik het).
- Indien Orthotouch nie die beleggers betaal nie, kan beleggers slegs in hul/hul entiteite se persoonlike hoedanigheid vir Orthotouch dagvaar op grond van die kontrak en kan dit nie met behulp van die HSAG klas-aksie geskied nie. Indien

hulle op 'n latere stadium heraansluit by die klas-aksie mag hulle 'n verweer van verjaring in die gesig staar.

- Beleggers moet 'n vertroulikheidsklousule onderteken wat hul verbied om enige inligting bekend te maak.
- Geen verdere rente sal betaal word aan beleggers nie, selfs al sou Orthotouch in kontrakbreuk wees.
- Indien Orthotouch gelikwieder word sal persone wat geskik het moontlik slegs 'n fraksie van hul eise teen die bates geregistreer in die naam van Orthotouch, tot hul beskikking hê.

Dit is algemene kennis dat mnr Nic Georgiou en mev Elna Visagie dreig om mnr Nic Georgiou se entiteite te likwieder en erger nog dat Mev Visagie en Mnr Hancke ene "Opsie 3" bemark, waar alle bates van Orthotouch na 'n nuwe maatskappy wat nog op die JEB genoteer moet word, oorgedra word. Dit beteken dat diegene wat daardie opsie uitoefen weinig, indien enige opbrengste sal ontvang as Orthotouch gelikwieder sou word (aangesien alle bates dan in die JEB-maatskappy sal berus).

Persone wat buite die HSAG skik sal geen beskerming tot hul beskikking hê indien Orthotouch nie sy verpligtinge nakom nie. Hulle sal dus regsstappe in hul persoonlike hoedanigheid moet instel waarvan die koste astronomies kan wees.

Mnr Hancke is nie 'n prokureur, geregistreerde finansiële adviseur of lid van die HSAG nie en HSAG-lede moet uiters versigtig wees om dokumente by hom te teken sonder om behoorlike regsadvies in te win, aangesien hy ook vir Orthotouch werksaam is. Sover ons kennis strek is Mev Visagie ook nie 'n geregistreerde finansiële adviseur nie. Skakel gerus die Raad op Finansiële Dienste by 0800 110 443 of besoek hul webtuiste by www.fsb.co.za om u vrae te beantwoord.

Win asseblief regsadvies in, alvorens u enige verdere dokumentasie met Orthotouch, mnr Nic Georgiou of hul agente soos Elna Visagie, Herman Lombaard of enige iemand anders soos Helgard Hancke, teken.

4. KOSTE

Vanuit die staanspoor is HSAG-lede in kennis gestel dat, afhangende van die aard en omvang van die saak asook die ondersteuning en samewerking deur voornemende HSAG-eisers, dit verwag kan word dat jaarlikse finansiële bydraes van die HSAG-lede aangevra moet word. Op hierdie stadium was daar slegs een opvraging van R1 000 bydrae tot regskoste per sindikasie. Dit kom daarop neer dat die lede van die HSAG minder as R1 per dag bygedra het, vanaf Augustus 2014 tot 19 Mei 2017, tot regskoste per sindikasie.

Nieteenstaande voormelde is daar steeds 'n groot aantal lede wat nie op datum is met hul betalings nie en wat uiteraard 'n groter las op die opbetaalde lede plaas. Hoewel nie-betaalde lede dus gesubsidieer word, is besluit dat HSAG-lede wie nie voldoen of

ten volle opbetaal is nie, die gevaar loop dat hul HSAG-lidmaatskap beëindig of opgeskort sou kon word. Dus word lede ernstig versoek om hul bydraes op datum te bring.

Die HSAG-bestuur het vroeër vanjaar besluit dat daar 'n verdere opvraging vir administrasie- en regskostes in Mei 2017 gehef gaan word. 'n Bedrag van R2 000 sal per persoon/belegger gehef word (en nie per sindikasie soos met die vorige opvraging nie) en sal sodoende beleggers met meer as twee sindikasies tegemoetgekom word. Gemelde bydrae word vervat in die maandstate wat per e-pos uitgestuur word.

Weens die groot aantal HS-beleggers wat tans by die HSAG geregistreer is, is dit moontlik vir die beleggers om slegs 'n fraksie van die koste te betaal en is dit onnodig om die minste van 25% van hul eisbedrae of dubbeld die regsverteenwoordigers se fooie as betaling aan te bied, soos wat deur Suid-Afrikaanse wetgewing gemagtig word.

Die gemiddelde grootte eis van die individuele Beleggers/Eisers beloop ongeveer R250 000. Indien daar op 'n gebeurlikheidsbasis (kommissie) opgetree sou word, sal dit beteken dat by 'n gemiddelde eis van R250 000 'n maksimum van R62 500 plus BTW verhaal sou kon word. Met 'n suksesvolle beslissing sal dit beteken dat 'n maksimum bedrag van tussen R70 000 en R80 000 deur Beleggers/voornemende Eisers aan regsverteenwoordigers betaal sou moes word wat heelwat meer is as die vorige en teenswoordige nominale bydraes wat nou gehef word.

Vanaf einde Mei 2017 sal persone met 'n totale eiswaarde van R20 000 of minder en met vooraf skriftelike versoeke aan Theron & Vennote, tegemoet gekom word en sal daar nie van hulle verwag word om 'n bydrae tot administrasie- en regskostes te maak nie.

Let wel: Geen registrasie-, administrasie- of regskostes is op enige stadium terugbetaalbaar nie.

5. UITSPRAAK – HOOGSTE HOF VAN APPÈL TE BLOEMFONTEIN

Die Hoogste Hof van Appèl in Bloemfontein het op 30 November 2016 in die guns van die HSAG, met koste beslis, en het spesifiek in 'n poging van Orthotouch om te appelleer teen 'n vorige uitspraak van Regter Spilg in Johannesburg, genoem dat die aangeleentheid suiwer interlokutêr was en dat daar in elk geval geen vooruitsig op sukses en geen genoegsame redes was waarom 'n appèl aangehoor moet word nie. Besigheidsreddingspraktisyn, Hans Klopper, het sy aansoek tot appèl teruggetrek.

Orthotouch en Hans Klopper is ingevolge dié uitspraak verplig om die prokureurs van die HSAG van 'n lys van persone wie geregtig was om kragtens die Artikel 155-Reëlinskema te stem en aan wie kennis daarvan gegee is, te voorsien. Die Ontvanger van Orthotouch, mnr Derek Cohen, is ook verplig om die HSAG Prokureurs met 'n lys van persone wat ten gunste van, of teen die goedkeuring van die Artikel 155-Reëlinskema gestem het, te voorsien.

Die ontvanger van Orthotouch, Mnr Derek Cohen, het aan ons firma 'n lys van persone wat skynbaar ten gunste van, of teen die goedkeuring van die Artikel 155-

Reëlinskema gestem het, gestuur, maar is die lys algeheel onduidelik en gebrekkig in so 'n mate dat dit nie duidelik is wie vir óf teen die Reëlinskema gestem het nie.

Nie Orthotouch of Hans Klopper het al die lys van persone aan ons gestuur wie geregtig was om kragtens die Art 155-Reëlinskema te stem of aan wie hulle kennis gegee het nie en is gevolglik in minagting van die Hofbevel. Die HSAG-bestuur sal besluit watter stappe geneem moet word.

Theron & Venote is reeds besig met die nodige stappe ten einde die gunstige Hofbevel af te dwing en sal weer eersdaags aan u daarvoor berig.

6. OPSIE 2 - UITBETALING

Verskeie beleggers het aangedui dat hulle betaling kragtens Opsie 2 (40% uitbetaling) ontvang het. Opsie 2 is een van die 3 opsies wat die beleggers ingevolge Orthotouch se Reëlinskema in 2014 kon kies. Orthotouch is kragtens 'n hofbevel verplig om aan persone wat Opsie 2 gekies het, hierdie gelde uit te betaal.

Dit is ons advokatuur se advies dat, om sodanige Opsie te kies, beleggers nie outomaties afstand gedoen het van hul reg om deel te wees van die HSAG klas-aksie nie. Beleggers wat 'n betaling op hierdie wyse ontvang het, het die geld ingevolge Opsie 2 ontvang, sonder enige verandering/inkorting van hul regte ten aansien van die HSAG klas-aksie. Selfs al kon dit op 'n latere stadium deur mnr Nic Georgiou en Orthotouch geargumenteer word dat die uitoefening van Opsie 2 beteken dat so 'n belegger nie deel kon wees van die klas-aksie nie, gaan die ontvangs van sodanige gelde nou (onder Opsie 2) nie die posisie vir 'n belegger verander of nadelig beïnvloed nie. As daar enige afstanddoening was om deel te wees van die HSAG klas-aksie, was dit deur destyds Opsie 2 te kies – en nie nou met die ontvangs van die gelde nie. Die ontvangs van die geld nou is 'n noodwendige gevolg van die destydse uitoefening van Opsie 2.

7. BLAAS HIER DIE FLUITJIE OP VALS EN ONDERMYNENDE INLIGTING

Ons kantore het heelwat positiewe reaksie ontvang van beleggers wat ons bewus gemaak het van derde partye (bv mnr Helgard Hancke en me Elna Visagie) wat aktief besig is met 'n smeerveldtog teen die HSAG en wat na bewering kwansuis in belang van die HSAG-lede optree, en wil u graag bedank dat u die inligting onder ons kantoor se aandag gebring het. Ons kan u verseker dat alle inligting wat aan ons gestuur word op 'n anonieme basis geskied.

Ons nooi beleggers en ondersteuners van die HSAG uit om enige relevante of belangrike inligting rakende die HSAG of die klas-aksie aan ons bekend te maak of om dokumente aan ons te stuur na hsagwhistle@gmail.com en sal die HSAG te alle tye poog om sodanige fluitjie-blasers te beskerm.

8. GEBRUIK VAN KORREKTE E-POS ADRESSE EN VERWYSINGS

Dit is van uiterste belang dat beleggers die korrekte e-pos adresse (soos vervat op ons webtuiste en e-posse) asook hul verwysingsnommers (bv.

identiteitsnommer ens.) vir alle kommunikasie gebruik. Indien 'n belegger 'n e-pos na die verkeerde adres sou stuur kan dit daartoe lei dat daardie e-pos nie die nodige aandag geniet nie wat aanleiding sal gee tot vermorsing van tyd en koste.

Bestaande e-pos adresse is as volg:

- hsactiongroup@gmail.com en hsagenquiries@gmail.com vir alle navrae rakende die klas-aksie en skikkingsproses.
- hsagregister@gmail.com vir die registrasie van nuwe lede van die klas-aksie.
- hsagsettle@gmail.com vir alle skikkingsooreenkomste en verwante dokumentasie.
- hsagwhistle@gmail.com vir alle vertroulike inligting wat anoniem aan ons gestuur moet word.

9. STAAT VIR DEELNAME AAN DIE HSAG

Vind asseblief hiertoe aangeheg u bydraestaat vir u deelname aan die HSAG.

Let asseblief op die volgende:

- 1 Sedert begin Januarie 2016 het die HSAG begin om trustopvragings te doen vir 'n bydrae tot regskoste vir die HSAG, Hooggeregshofsake en aanverwante aangeleenthede wat deur die HSAG gedryf word. Sodoende word die HSAG-lede se individuele regte en belange asook die HSAG-groepsregte en -belange beskerm. Hierdie bedrag behoort op u staat te reflekteer. Indien geen opvraging ten aansien van regskostes op u staat verskyn nie, beteken dit dat u waarskynlik in 'n groep val wat nog nie geprosesseer en/of geallokeer is nie, en sal dit op 'n latere staat verskyn. Die aangevraagde bedrag vir 2016-regskoste was R1 000 per sindikasie. In Mei 2017 word 'n verdere opvraging vir bydrae tot regs- en administrasiekoste van R2 000 per persoon gemaak. 'n Eenmalige registrasiekoste per sindikasie was ook gehef en sal ook op u staat verskyn. Let asseblief daarop dat die inligting op ons rekords verkry is vanaf aansoekvorms. Indien u aansoekvorm gevolglik foutief of onduidelik is, sal u moontlik geen state of e-posse ontvang nie. Voltooi asseblief die HSAG-vraelys op "Monkey Survey" op ons webuitste ten einde u inligting op datum te bring.
2. Klik asseblief op die skakel om na die "Customer Zone" te gaan waar u die opvragings vir registrasie-, regskostes en u betalings kan sien.
3. Weens aaneenlopende groot hoeveelheid navrae, registrasies, wysigings van persoonlike besonderhede en allokasies, is dit moontlik dat sommige betalings en/of registrasies nie op die aangehegte Staat sal verskyn nie, maar eers op 'n latere Staat. Maak asseblief seker dat u inligting korrek is.

4. Geoutomatiseerde state sal van tyd tot tyd (normaalweg maandeliks) uitgestuur word, maar u skakel na die "Customer Zone" sal deurentyd aktief bly en u kan ter enige tyd u betalings en transaksies daarop sien, soos wat dit geallokeer word.
5. Indien daar enige uitstaande bedrae is word u vriendelik versoek om dit so spoedig moontlik te betaal ten einde onnodige administrasie en/of verdere kostes te verhoed. Sodanige lede loop die gevaar dat hul lidmaatskap by die HSAG opgeskort word.
6. Registrasieheffings is betaalbaar op alle nuwe en agterstallige (90 dae en ouer) registrasies. Registrasiekoste beloop tans R1 500,00 per sindikasie en, indien latere registrasies toegelaat word, sal daar waarskynlik 'n verdere heffing vir registrasiekoste per sindikasie vir alle nuwe registrasies gehef word ten einde finansiële bydraes deur huidige HSAG-lede te verlig.
7. Deelname aan die HSAG is algeheel vrywillig maar sal persone wat nie aan die HSAG behoort of hul versoekte bydrae op datum hou nie, nie aanspraak kan maak op enige regte of voorregte wat getroue lede van die HSAG geniet nie. Persone wat hardvogtig weier of versuim om ledebydraes te maak se lidmaatskap sal beëindig word.
8. Ons bedank u vir u lojale ondersteuning waarsonder die HSAG klas-aksie nie moontlik sou wees nie. U kan verseker staatmaak op ons onverdeelde lojale ondersteuning van die HSAG-lede en geassosieerdes.
9. Enige navrae kan aan hsagenquiries@gmail.com gerig word.

Vriendelike groete

Theron en Vennote

Tel: (021) 887 7877

hsactiongroup@gmail.com